

四庫全書

史部

欽定四庫全書

史部

直齋書錄解題卷八

詳校官侍講學士臣法式善

編修臣程嘉謨覆勘

覆校官庶子臣鄒奕孝

校對官中書臣孫球

謄錄監生臣馮省槐

欽定四庫全書

直齋書錄解題卷八

宋 陳振孫 撰

譜牒類

姓源韻譜一卷

唐張九齡撰依春秋正典柳氏萬姓錄世本圖摭
諸書纂為此譜分四聲以便尋閱古者賜姓別之黃
帝之子得姓者十四人是也後世賜姓合之漢高帝
命婁敬項伯為劉氏是也惟其別之也則離析故古

者論姓氏推其本同惟其合之也則亂故後世論姓氏識其本異自五胡亂華百宗蕩析夷夏之裔與夫冠冕輿臺之子孫混為一區不可遽知此周齊以來譜牒之學所以貴於世也歟

元和姓纂十卷

唐太常博士三原林寶撰元和中朔方別帥天水閻某者封邑太原以為言上謂宰相李吉甫曰有司之誤不可再也宜使儒生條其源系考其郡望子孫職

任並總緝之每加爵邑則令閱視吉甫以命寶二十
旬而成此書絕無善本頃在莆田以數本參校僅得
七八後又得蜀本校之互有得失然粗完整矣

李氏皇室維城錄一卷

屯田郎中李衢沔王長史林贊修止於僖宗蓋昭宗
時所錄也

李氏房從譜一卷

唐洛陽主簿李匡文撰時為圖譜官

聖唐偕日譜一卷

前賀州刺史李匡文撰序言前守職圖籍日撰天潢源派譜統務在省畧直取相承一葉旁附首分諸房今特從聖唐以來列聖下諸王公主逐帝書出號曰偕日與日齊行之義也匡文字濟翁又有資暇集見於錄

唐宰相甲族一卷

唐韋述蕭穎士等撰自王方慶而下十有四家

唐相門甲族諸郡氏譜共一卷

不著名氏甲族八十六家氏譜自京兆八姓而下凡
三百五十姓

唐杜氏家譜一卷

唐太子賓客杜信撰

天下郡望氏族譜一卷

唐李林甫等天寶八年所纂並附五音於後

姓苑二卷

不著名氏古有何承天姓苑今此以李為卷首當是
唐人所為

姓解三卷

鴈門邵思撰以偏旁字類為一百七十門二千五百
六十八氏景祐二年序

千姓編一卷

不著名氏末云嘉祐八年采真子記以姓苑姓源等
書撮取千姓以四字為句每字為一姓題曰千姓編

三字亦三姓也逐句文義亦頗相屬殆千字文之比云

陳郡袁氏譜一卷

袁陟世弼錄

陶氏家譜一卷

懷州教授陶直夫錄侃之後也

帝王系譜一卷

武夷吳達

案文獻通攷作吳達

公路撰政和壬辰也自漢迄周

顯德每代畧具數語其論曹操迫脅君后無復臣禮
逆節已顯會其病死故纂竊之惡漏在身後昔人謂
其不敢危漢者亦不覈其情耳此論與愚意脗合

羣史姓纂韻譜六卷

案文獻通攷作羣史姓纂韻譜原本誤作羣吏今改正

永福黃邦先宋顯撰凡史傳所有姓氏皆有韻類聚
而著其所出建炎元年其兄邦俊宋英為之序

古今姓氏書辨證四十卷

校書郎史館校勘臨川鄧名世元亞撰其子椿年緒

成之

皇朝百族譜四卷

長沙丁維臯撰周益公為之序時紹興末也僅得百二十有三家其闕遺尚多未有能續裒集者

米氏譜一卷

奉直大夫米憲錄益國初勲臣米信之後信五世為節元章又三世為憲

目錄類

唐藝文志四卷

新唐書中錄出別行監中有印本

崇文總目一卷

景祐初學士王堯臣同聶冠卿郭縝

案文獻通攷作縝

呂公

綽王洙歐陽脩等撰定凡六十六卷諸儒皆有論議

歐公文集頗見數條今此惟六十六卷之目耳題云

紹興改定

案晁公武讀書志是書刊正訛謬條次之凡四十六類計三萬六百六十九卷通考

作總目六十四卷此云一卷者或因鄭漁仲之言以排此諸儒每書之下必出新意著說嫌其繁蕪無用

故紹興中從而去其
序釋僅存其目也

秘書省四庫闕書目一卷

亦紹興改定其闕者注闕字於逐書之下

邯鄲書目十卷

學士河南李淑獻臣撰號圖書十志皇祐己丑自作
序以示子孫曰朋圭芻者其子壽朋復圭德芻也

京兆金石錄六卷

北平田概纂元豐五年王欽臣為序自為後序皆記

京兆府縣古碑所在覽之使人慨然

集古錄跋尾十卷

歐陽修撰編述之意序文詳之世所共知不復著

集古目錄二十卷

公子禮部郎官裴叔弼撰公既為跋尾二百九十六

篇命裴撮其大要別為目錄裴之序云爾今考集中

凡三百五十餘跋

案以上三條文獻通攷引陳氏之言原本俱脫去今補入

太宗御製御書目一卷

玉宸殿所藏兼有真宗御製序十四篇又本稍多而無序文

真宗御製碑頌石本目錄一卷

凡九十名件乾興所刊板

龍圖閣瑞物寶目六閣書籍圖畫目共一卷

玉宸殿書數附

已上平江虎丘寺御書閣有原頒降印本傳寫得之

羣書備檢三卷

案文獻通攷作十卷

不知名氏皆經史子集目錄

廣川藏書志二十六卷

徽猷閣待制董道彥遠撰以其家藏書考其本末而為之論說及於諸子而止蓋其本意專為經設也

廣川書跋十卷畫跋五卷

董道撰

寶墨待訪錄二卷

禮部員外郎米芾元章撰記承平時故家所藏晉唐

遺跡

金石錄三十卷

東武趙明誠德甫撰其所藏二千卷蓋倣歐陽集古而數則倍之本朝諸家蓄古器物款式其考訂詳洽如劉原父呂與叔黃長睿多矣大抵好附會古人名字如丁字即以為祖丁舉字即以為伍舉方鼎即以為子產仲吉匱即以為偁姑之類遽古以來人之生世夥矣而僅見於簡冊者幾何器物之用於人亦夥矣而僅存於今世者幾何迺以其姓字名物之偶同

而實焉余嘗竊笑之惟其附會之過併與其詳洽者皆不足取信矣惟此書跋尾獨不然好古之通人也明誠宰相挺之之子其妻易安居士李氏為作後序

頗可觀

案此條文獻通攷引陳氏之言原本誤脫今補入

考古圖十卷

汲郡呂大臨與叔撰其書作於元祐七年所紀自御府之外凡三十六家所藏古器物皆圖而錄之

博古圖說十一卷

祕書郎邵武黃伯思長睿撰有序凡諸器五十九品
其數五百二十七印章十七品其數二百四十五案
李丞相伯紀為長睿志墓言所著古器說四百二十
六篇悉載博古圖今以圖說攷之固多出於伯思亦
有不盡然者又其名物亦頗不同錢鑑二品至多此
所載二錢二鑑而已博古不載印章而此印章最夥
蓋長睿沒於政和八年其後修博古圖頗採用之而
亦有所刪改云爾其書大抵好傳古人名字說已見

前

宣和博古圖三十卷

宣和殿所藏古器物圖其形製而記其名物錄其款識品有總說以舉其凡而物物考訂則其目詳焉然亦不無牽合也

羣書會記二十六卷

案文獻通攷作三十六卷

鄭樵撰大畧記世間所有之書非必其家皆有之也

夾漈書目一卷 圖書志一卷

鄭樵記其平生所自著之書志者蓋述其著作之意也

秦氏書目一卷

濡須秦氏元祐二年有為金部員外郎者聞於朝請以宅舍及文籍不許子孫分割

藏六堂書目一卷

莆田李氏云唐江王之後有家藏誥命其藏書自承平時今浸以散逸矣

欽定四庫全書

卷八

吳氏書目一卷

奉議郎漳浦吳與可權家藏閩中不經兵火故家文籍多完具然地濕苦蠹損

晁氏讀書志二十卷

案宋史藝文志作四卷

昭德晁公武子止撰其序言得南陽公書五十篋合其家舊藏得二萬四千五百卷其守榮州日夕讎校每終篇輒論其大指時紹興二十一年也其所發明有足觀者南陽公未知何人或云井度憲孟也

案井度文

獻通攷
作卅度

遂初堂書目一卷

錫山尤氏尚書衮延之淳熙名臣藏書至多法書尤
富嘗燼於火今其存亡幾矣

中興館閣書目三十卷

祕書監臨海陳騭叔進等撰淳熙五年上之中興以
來庶事草創網羅遺逸中秘所藏視前世獨無歉焉
殆且過之大凡著錄四萬四千四百八十六卷蓋亦

盛矣其間攷究疏謬亦不免焉

館閣續書目三十卷

祕書丞吳郡張攀從龍等撰嘉定十三年上以淳熙後所得書纂續前錄草率尤甚凡一萬四千九百四十三卷

隸釋一十七卷隸續二十一卷

丞相鄱陽洪适景伯撰凡漢刻之存於世者以今文寫之而為之釋又為之世代譜及物象圖碑形式悉

具之魏初近古者亦附焉年來北方舊刻不可復得
覽此猶可慨想

法寶標目十卷

戶部尚書三槐王右敏仲撰以釋藏諸函隨其次第
為之目錄而釋其因緣凡佛會之先後華譯之異同
皆具著之右旦之曾孫入元祐黨籍

鄭氏書目七卷

莆田鄭寅子敬以所藏書為七錄曰經曰史曰子曰

藝曰方技曰文曰類寅知樞密院僑之子博文彊記
多識典故端平初召為都司執法守正出為漳州以
沒

集古系時錄十卷系地錄十一卷

鄭樵撰大抵因集古之舊詳考其時與地而系之二

書相為表裏

案此條文獻通攷引陳氏之言原本脫今補入

寶刺叢編二十卷

臨安書肆陳思者以諸家集古書錄用九域志京府

州縣繫其名物而昔人辨證審定之語具著其下其
不詳所在附末卷

釋書品次錄一卷

題唐僧從梵集末有黎陽張翬跋稱大定丁未蓋北
方板本也

地理類

山海經十八卷

漢侍中奉車都尉臣秀所校祕書秀即劉歆也晉郭

璞注案唐志二十三卷音二卷今本錫山尤袤延之
校定世傳禹益所作其事見吳越春秋曰禹東巡登
南岳得金簡玉字通水之理遂行四瀆與益共謀所
至使益疏而記之名山海經此其為說恢誕不典司
馬遷曰言九州山川尚書近之矣至禹本紀山海經
所書怪物余不敢言之也可謂名言孰曰多愛乎故
尤跋明其為非禹伯翳所作而以為先秦古書無疑
然莫能名其為何人也洪慶善補注楚辭引山海經

淮南子以釋天問而朱晦翁則曰古今說天問者皆本此二書今以文意考之疑此二書本皆緣解天問而作可以破千載之惑古今相傳既久姑以冠地理書之錄

水經三卷水經注四十卷

桑欽撰後魏御史中尉范陽酈道元善長注桑欽不知何人邯鄲書目以為漢人晁公武曰成帝時人當有所據案唐志注或云郭璞撰又杜氏通典案水經

晉郭璞注二卷後魏酈道元注四十卷皆不詳所撰
者名氏亦不知何代之書佑謂二子博瞻解釋固應
精當然其經云濟水過壽張則前漢壽良縣光武更
名又東北過臨濟則前漢狄縣安帝更名又云洹水
過湖陸則前漢湖陵縣章帝更名又云汾水過河東
郡永安則前漢彘縣順帝更名故知順帝以後纂序
也詳水經所作殊為詭誕全無憑據案後漢郡國志
濟水王莽末因旱渠塞不復截河南過統順帝時所

撰都不詳悉其餘可知景純注解又甚疏略亦為迂怪以其僻書人多不覩謂其審正未之精也

案成帝時人以

下原本俱脫漏今據文獻通攷所引陳氏之言補入

唐十道圖一卷

唐宰相趙郡李吉甫宏憲撰首載州縣總數文武官員數俸料唐志云十卷今不分卷

元和郡縣志四十卷

案新唐書藝文志李吉甫元和郡縣圖誌五十四卷

李吉甫撰自京兆至隴右凡四十七鎮篇首有圖今

不存

唐十道四蕃志十卷

案文獻通攷作十三卷

唐太府少卿梁載言撰其書廣記備言頗可觀載言不見於史又有具員故事題鳳閣舍人及梁四公記亦云載言所錄

太平寰宇記二百卷

太常博士直史館宜黃樂史子正撰起自河南周於海外當太宗朝上之

元豐九域志十卷

知制誥丹陽王存正仲集賢校理南豐曾肇子開官
制所檢討邯鄲李德芻等刪定總二十三路四京十
府二百四十二州三十七軍四監一千一百三十五
縣

輿地廣記三十八卷

廬陵歐陽忞撰政和中作其前三卷以今之郡縣系
於前代郡國之下其序曰以今州縣求於漢則為郡

以漢郡縣求於三代則為州三代之九州散而為漢之六十餘郡又分而為今之三百餘州雖或離或合不可討究而吾胸中則已了然矣漢郡國一百三今云六十餘郡不可曉也恣為文忠族孫行名皆連心字

地理指掌圖一卷

蜀人稅安禮撰元符中欲上之朝未及而卒書肆所刊皆不著名氏亦頗闕不備此蜀本有涪石任愷序

言之頗詳

歷代疆域志十卷

臨川布衣吳澣撰

輿地紀勝二百卷

知江寧縣金華王象之撰蓋以諸郡圖經節其要略而山川景物碑刻詩詠初無所遺行在宮闕官寺實冠其首闕河版圖之未復者猶不與焉眉山李說齋李允為之序

輿地圖十六卷

王象之撰紀勝逐州為卷圖逐路為卷其搜求亦勤矣至西蜀諸郡尤詳其兄觀之漕夔門時所得也

皇朝方域志二百卷

東陽布衣王希先撰凡前代謂之譜十六譜為八十卷本朝謂之志為一百二十卷譜叙當時事實而注以今之郡縣志述今日疆理而系於古之州國古今參考譜志互見地理學之詳明者無以過此矣嘉熙

二年上于朝得永免文解其父珪本建寧人已未進士試詞科不中頗該洽希先述其遺藁以成此書

東京記三卷

龍圖閣直學士宋敏求次道撰上卷為宮城周五里唐時宣武節度使治所建隆三年廣城之北隅用洛陽宮殿之制修之中卷為舊城周二十一里一百五十步唐汴州城也號闕城亦曰裏城下卷為新城周四十八里二百三十三步周世宗所築羅城也號曰

國城又曰外城三城之內宮殿官府坊巷第宅寺觀
營房次第記之

河南志二十卷

宋敏求撰司馬溫公序之時元豐六年次道歿矣

長安志二十卷

宋敏求撰趙彥若元考為之序二書凡例微不同然

漢唐舊都遺事詳矣

關中記一卷

晉葛洪稚川撰所載殊簡略

三輔黃圖二卷

不著名氏案唐志一卷今分上下卷載秦漢間宮室
苑囿甚詳多引用應劭漢書解而如淳顏師古復引
此書為據意漢魏間人所作然中興書目以為崇文
總目及國史志不載疑非本書也程氏雍錄辨之尤
悉

長安圖記一卷

案呂大防著長安圖記此
本作長安國記誤今改正

丞相汲公呂大防知永興軍以為正長安故圖著其說於上今信安郡有此圖而別錄其說為一編

洛陽伽藍記五卷

後魏撫軍司馬楊銜之撰專記洛陽城內外寺院爾朱之亂城郭丘墟追述斯記

洛陽名園記一卷

禮部員外郎濟南李格非文叔撰記開國以來公卿家園圃之盛其末言天下治亂之候在洛陽之盛衰

洛陽盛衰之候在名園之興廢使人感慨格非以不肯與編元祐章奏入黨籍國史文苑有傳世所謂易安居士清照者其女也格非苦心為文而集不傳館中亦無有惟錫山尤氏有之文鑑僅存此跋蓋亦未嘗見其全集也

鄴中記一卷

案唐書藝文志有陸翹鄴中記二卷疑即是書

不著名氏記自魏而下及僭偽都鄴者六家宮殿事迹案唐志有鄴都故事二卷肅代時馬溫所作今書

多引之

晉陽事跡雜記十卷

唐河東節度使李璋纂序言四十卷唐志亦同今刪
為十卷蓋治平中太原府所刻本也從莆田李氏借
錄自南渡以來關河阻絕圖志泯亡得見一二僅存
者猶足以發傷今思古之歎然唐并州治晉陽太原
二縣國初克復徙治陽曲而墟其故二縣後皆併省
則唐之故跡皆不復存矣

燕吳行役記二卷

不著名氏大中九年崔鉉鎮淮南諸鎮畢賀為此記者燕帥所遣僚佐道中紀所經行郡縣道里及事迹也其曰我府張公者時張允中方帥燕也唐志稱張氏宣宗時人失其名張者其帥之姓爾未審何以知使者之亦為張氏也

臨安志十五卷

府帥吳興周淙彥廣撰首卷為行在所於宮闕殿閣

全不記載藉曰禁省嚴秘不敢明著其視宋次道東京記何其大不侔其他沿革亦多疏畧然淙有才具其尹京開湖濬河皆有成緒今城中河道通利民戶為脚船以濟行旅者蓋自此始

吳興統記十卷

攝湖州長史左文質撰分門別類古事頗詳序稱甲辰歲者本朝景德元年也

吳興志二十卷

樞密院編修郡人談鑰元時撰

案文獻通攷作談鑰撰原本誤作論今改

正嘉泰元年也其為書草率未得為盡善

蘓州圖經六卷

翰林學士饒陽李宗諤昌武等撰景德四年詔以四方郡縣所上圖經刊修校定為一千五百六十六卷以大中祥符四年頒下今皆散亡館中僅存九十八卷余家所有惟蘓越黃三州刻本耳

吳郡圖經續記三卷

秘書省正字郡人朱長文伯原撰記祥符以後事亦頗補前志之闕遺長文吳中名士病廢不仕自號樂圃卒於元符元年

吳地記一卷

唐陸廣微撰郡人也多記古吳國事唐未有秀州天禧中始割嘉興縣置故此記合二郡為一

吳郡志五十卷

參政郡人范成大至能撰書始成未行而石湖沒有

求附見某事而弗得者譁曰此非石湖筆也太守不能決藏其書學官然周益公為范墓碑述所著書目有焉及紹定初桐川李壽朋儔老為守始取而刻之而書止於紹熙

案文獻通攷作其書止於紹興

其後事實俾寮屬用

褚少孫史記例補成之趙南塘履常作序訂其為石

湖書不疑且謂郡士龔頤正

案宋史藝文志作龔頤正此本誤作順正今改

正
滕宓周南皆嘗薦所聞於公者而龔尤多

鎮江志三十卷

教授天台盧憲子章撰

新定志八卷

郡守東平董弁令升撰紹興己未也淳熙甲辰武義

陳公亮重修

嘉禾志五卷故事一卷

郡守毗陵張元成撰為書極草草

毗陵志十二卷

教授三山鄒補之撰

越州圖經九卷

李宗諤祥符所上也未有秘閣校理李垂邵煥修

宋案

史藝文志作邵煥修此本作撰修誤今改正

及覆修名銜然則書成於衆

手而宗諤特提總其凡耳

會稽志二十卷

通判吳興施宿武子郡人馮景中陸子虛朱鷟王度
等撰陸放翁為之序首稱禹會諸侯而以思陵巡狩
陞府配之氣壯文雅蓋奇作也嘉泰辛酉陸年已七

十七矣未幾始落致仕為史官至八十五歲乃終其筆力老而不衰於此序見之

會稽續志八卷

梁國張湔撰續記辛酉後事而亦補前志之遺前志無進士題名此其尤不可遺者也

赤城志四十卷

國子司業郡人陳耆卿壽老撰其前為圖十有三

赤城續志八卷

郡人吳子良拾其所遺續載之

赤城三志四卷

郡人林表民逢吉撰紹定己丑水壞城修治興築本末詳焉

四明志二十一卷

贛州錄事參軍廬陵羅璿修時胡榘仲方尚書為守璿其鄉人也

永嘉譜二十四卷

欽定四庫全書



直隸書錄解題

五

禮部侍郎郡人曹叔遠器遠撰曰年譜地譜名譜人譜時紹熙三年太守宛陵孫楫屬器遠哀集創為義例如此器遠庚戌進士蓋初第時也

永寧編十五卷

待制郡人陳謙益之撰漢分章安之東甌鄉為永寧今永嘉四邑是也故以名編時嘉定九年留元剛茂潛為太守

東陽志十卷

樞密鄧陽洪遵景嚴撰紹興二十四年

案文獻通攷作紹興二十

四年此本作三十四年誤紹興止有三十二年也今改正

為通判時所作

拈蒼志七卷

教授曾賁撰乾道六年太守四明樓璩叔韞序鐫之

父也

拈蒼志續一卷

郡人陳百朋撰

信安志十六卷

教授衛玠撰太守四明劉屋也實嘉定己卯

信安續志二卷

教授葉汝明撰太守四明袁甫廣微紹定初也

建康志十卷

府帥史正志志道撰時乾道五年

建康續志十卷

府帥吳琚居父以郡人朱舜庸所編銓次與前志並

行時慶元六年

六朝事迹二卷南朝宮苑記二卷

不知何人作記六朝故都事迹頗詳

姑孰志五卷

教授長樂林桷子長撰太守楊愿原仲也實淳熙五年

新安志十卷

通判贛州郡人羅愿撰時淳熙二年太守則趙不悔也

秋浦志八卷

太守南昌胡兆乾道八年修

秋浦新志十六卷

三山王伯大幼學以前志缺陋重修時以庾節攝郡

事端平丙申也

南康志八卷

郡守朱端章撰淳熙十二年

桐汭新志二十卷

教授錢塘趙子直撰紹熙五年也太守林槩序

案文獻通

攷作紹
定五年

豫章職方乘三卷後乘十二卷

郡人洪芻駒父宣和己亥撰乘取晉乘為名後乘淳

熙十一年太守程叔達序

潯陽志十二卷

迪功郎晁百揆元采撰淳熙三年太守開封曹訓為

之序

宜春志十卷

袁州教授南城童宗說修太守李觀民也

盱江志十卷續十卷

郡守胡舜舉紹興戊寅俾郡人童宗說黃敷忠為之
續志慶元五年三山陳岐修亦郡守也

富川志六卷

軍學教授括蒼潘廷立撰太守趙善宣紹熙四年也
軍治永興本富川縣故名

南安志二十卷補遺一卷

太守方崧卿教授許開修

廣陵志十二卷

教授三山鄭少魏江都尉會稽姚一謙撰紹熙元年

太守鄭興裔也

楚州圖經二卷

教授雲川吳葦商卿撰太守毗陵錢之望大受時淳

熙十三年

永陽志三十五卷

滁守林嶠命法曹龔維蕃修

吳陵志十卷

不著名氏淳熙壬寅所修後三年乙巳太守錢塘萬鍾元亨屬僚佐叅正而刻之泰州在唐為吳陵縣

高郵志三卷續修十卷

興化縣主簿孫祖義撰郡守趙不慙刻之淳熙四五年間也其書在圖志中最為疏略嘉定中守汪綱再

修稍詳定矣

都梁志八卷

郡守霍麓教授周之瑞修紹熙元年也

續志一卷

嘉泰壬戌郡守耿與義序

案郡守以下原本闕
今據文獻通攷補

合肥志四卷

合肥主簿唐錡撰郡守鄭興裔也時淳熙十五年

同安志十卷

毗陵錢紳仲仲撰宣和五年太守曰曾元禮未幾而有邊難至紹興十三年太守張彥聲始取而刻之

歷陽志十卷

郡守九華程九萬鵬飛教授天台黃宜達之撰慶元元年

黃州圖經四卷附錄一卷

李宗諤祥符所修圖經亦頗有後人附益者郡守李訖又以近事為附錄焉訖叅政邴漢老之子也

齊安志二十卷

郡守呂昭問俾教授厲居正重修慶元己未也

濠梁志三卷

郡守永嘉張李樗撰時嘉泰初元

無為志三卷

教授宋宜之纂太守柴瑾為之序

襄陽志四十卷

郡守胸山高夔命教授吳興劉宗幕官上蔡任汾編

纂為書既詳備而刊刺亦精緻圖志之佳者

襄沔記三卷

唐吳從政撰刪宗懔荆楚歲時記盛宏之荊州記鄒閔甫楚國先賢傳習鑿齒襄陽耆舊傳郭仲產襄陽記鮑堅南雍州記集成此書其紀襄漢事迹詳矣景龍中人自號棲閑子

房州圖志三卷

郡守毗陵陳宇撰

義陽志八卷

郡守河內關良臣撰紹熙二年也信陽軍唐申州所謂申光蔡吳元濟所據竭天下之力以取之者

長沙志五十二卷

郡守趙善俊以紹熙二年命教授褚孝錫等七人撰時陳止齋將漕相與攷訂商略故序言當與長樂志並也

續長沙志十一卷

不著名氏錄紹興以後事

長沙土風碑一卷

唐潭州刺史河南張謂撰前有碑銘後有湘中記載
事迹七十件

衡州圖經三卷

郡守三山孫德輿行之撰嘉定戊寅刺

零陵志十卷

郡守徐自明嘉定己卯重修

春陵圖志十卷

教授臨江章穎茂憲撰淳熙六年太守趙汝誼

九疑攷古二卷

道州崇道主簿吳致堯格甫撰取春陵志所紀而為

詩以記之宣和甲辰序

清湘志六卷

郡守永嘉陳峴壽南俾教授林瀛修

案文獻通攷作林瀛原本誤作

灑今改正嘉泰二年也

武昌志三十卷

郡守括蒼王信成之命教授許中應等撰

武昌土俗編二卷

武昌令永嘉薛季宣撰記一縣之事頗詳紹興辛巳

壬午間也其邑今為壽昌軍

鄖城志十二卷

教授傅巖撰慶元戊午太守李楫

岳陽志甲二卷乙三卷

甲集建安馬子嚴莊父乙集永嘉張聲道聲之所修
皆郡守也

岳陽風土記一卷

宣德郎監商稅務建安危致明晦叔撰

案文獻通攷
作范致明

元符進士第二人仕至次對其在岳蓋謫官也

辰州風土記六卷

教授縉雲田渭伯清撰隆興二年郡守徐彭年

成都古今集記三十卷

知府事信安趙抃閱道撰清獻自慶歷將漕之後凡
四入蜀知蜀事為詳故成此書熙寧七年也

續成都古今集記二十二卷

知府事王剛中居正撰寶紹興三十年余嘗手寫洛
陽名園記而題其後曰晉王右軍聞成都有漢時講
堂秦時城池門屋樓觀慨然遠想欲一遊目其與周
益州帖蓋數致意焉近時呂太史有感於宗少文卧
遊之語凡昔人紀載人境之勝錄為一編其奉祠毫

社也自以為譙沛真源恍然在目而究之太極嵩之
崇福華之雲臺皆將卧遊之噫嘻弧矢四方之志高
人達士之懷古今一也顧南北分裂蜀在境內雖遠
患不徃爾徃則至矣毫兗嵩華視蜀猶邇封也欲徃
其可得乎然則太史之情其可悲也已余近得此記
手寫一通與東京記長安河南志夢華錄諸書並藏
而時自覽焉是亦卧遊之意云爾于時歲在己丑蜀
故亡恙也後七年而有北兵秦漢故跡焚蕩無遺今

其可見者惟此二記耳而板本亦不可復得矣嗚呼
悲夫 己丑實理宗紹定二年也後七年即理宗端
平三年丙申歲是年自九月二十九日夜沔利都統
兼關外四川安撫知沔州曹友聞戰死之後十二月
北兵入普州順慶潼川府破成都掠眉州五十四州
俱陷破獨夔州一路及瀘果合數州僅存友聞初以
明經登丙戌科縣谷縣尉制置桂如淵擢為天水教
授與田遂陳瑀俱招忠義官至員外郎自乞換武積

官至眉州防禦使左驍衛大將軍朝廷贈龍圖學士
大中大夫賜廟號忠謚曰節所部皆精銳敵畏之目
為短曹遍身膽時人稱之曰元戎制勝世間有教授
提兵天下無是役也北之主將統兵者四太子并達
海也

蜀記二卷

唐鄭暉撰雜記蜀事人物古跡寺觀之屬未詳何人
梁益記十卷

著作佐郎益州知錄事參軍任弁撰天禧四年自為序

長樂志四十卷

府帥清源梁克家叔子撰淳熙九年序時永嘉陳傅良君舉通判州事大畧皆出其手

閩中記十卷

唐林誥撰本朝慶歷中有林世程者重修其兄世矩作序謂郡人養高不仕當大中時世程亦郡人也其

言永嘉之亂中原仕族林黃陳鄭四姓先入閩可以
證閩人皆稱光州固始之妄

建安志二十四卷續志一卷

刪定官郡人林光撰慶元四年郡守永嘉張叔椿俾
僚屬成之續志嘉定十二年府學士人所錄

清源志七卷

通判州事永嘉戴溪肖望撰時慶元己未太守信安

劉穎也

延平志十卷

郡守新安胡舜舉汝士與郡人廖拱廖挺哀集時紹興庚辰也序言與盱江志並行蓋其為建昌守亦嘗修圖志云

清漳新志十卷

司理參軍方杰撰嘉定六年太守趙汝諧蹈中也

鄞江志八卷

汀州

郡守古靈陳昱日華俾昭武士人李臯為之時慶元

戊午郡有鄧江溪故名

莆陽志十五卷

郡守趙彥勵懋訓紹熙三年集郡士為之

武陽志十卷

教授葛元隲撰太守廖遲元達乾道六年也

晉江海物異名記三卷

祕書監莆田陳致雍撰致雍仕偽閩南唐後歸朝

廣州圖經二卷

教授王中行撰

南越志七卷

宋武康令吳興沈懷遠撰此五嶺諸書之最在前者也懷遠懷充之弟見宋書

番禺雜記一卷

攝南海主簿鄭熊撰國初人也莆田借李氏本錄之蓋承平時舊書未有河南少尹家藏六字不知何人也

桂林志一卷

靜江教授江文叔編時乾道五年張維為帥撰次疏略刊刺草率亦不分卷次

桂林風土記一卷

案唐書藝文志作三卷

唐融州刺史權知春州莫休符撰昭宗光化二年也
桂海虞衡志二卷

府帥吳郡范成大至能撰范自桂移蜀道中追記昔
游

高涼志七卷

教授莆田劉崇撰太守春陵義太初嘉泰壬戌也

邕管雜記一卷

庫部員外郎范旻撰旻國初宰相質之子嶺南初平

旻知邕州兼轉運使

嶺外代答十卷

永嘉周去非直夫撰去非癸未進士至郡倅所記皆

廣西事

南方草木狀一卷

晉襄陽太守嵇含撰

黃巖志十卷

知縣永嘉蔡範蓮甫撰嘉定甲申

旌川志八卷

知旌德縣歷陽李瞻伯山撰紹熙三年謝昌國為序

涇川志十三卷

知涇縣濡湏王栾叔永撰嘉定癸酉趙南塘序之初

縣歲有水患庚午冬叔永改卜於舊治之東二里曰
留村

新吳志二卷

知奉新縣盱江張國均維之撰新吳縣舊名嘉定甲
戌

樂清志十卷

縣令信安袁采君載撰

脩水志十卷

分寧軍徐筠撰

連川志十卷

知連江縣豫章陶武克之撰嘉定乙亥

歷代宮殿名一卷

翰林承旨李昉等纂歷代及僭偽宮殿門闕樓觀園
苑池館名無不畢錄

五嶽諸山記一卷

無名氏多鄙誕不經

王屋山記一卷

唐乾符三年道士李歸一撰

華山記一卷

不知名氏

西湖古跡事實一卷

錢塘進士傅收撰以楊蟠百詠增廣共為一百八十

三首

案首字文獻
通攷作目

紹興壬午序

青城山記一卷

蜀道士杜光庭撰

茅山記一卷

嘉祐六年句容令陳倩修

幙阜山記一卷

案方輿勝覽寧州有幙阜山在分寧西百四十里此本誤作纂阜今改正

葛洪撰其山在豫章

豫章西山記一卷

贊皇李上文撰嘉祐丁酉歲

玉笥山記一卷

唐道士令狐見堯撰山在新淦別本又有南唐及本朝事後人所益也

湘中山水記三卷

晉耒陽羅含君章撰范陽盧拯注

案文獻通攷作盧拯此本誤作盧極

今改正

其書頗及隋唐以後事則亦後人附益也

天台山記一卷

唐道士徐靈府撰元和中人也余假守臨海就使本道嘉熙丙申十月解郡符趨會稽治所道過之銳欲

往遊會大雪不果改轅由驛道至今以為恨偶見此
記錄之以寄卧遊之意

顧渚山記一卷

唐陸羽鴻漸撰鄉邦不貢茶久矣遺迹未必存也

廬山記五卷

屯田員外郎嘉禾陳舜俞令舉撰劉渙凝之李常公
擇皆為之序令舉熙寧中謫居所作

續廬山記四卷

南康守廣陵馬玕錄山中碑記之文以續前錄

九華拾遺一卷

山居劉放至和二年自序曰滕天章作新錄於前沈
太守撰總錄於後博攷傳聞復得三十餘節

武夷山記一卷

杜光庭撰

羅浮山記一卷

廬陵郭之美撰皇祐辛卯序

霍山記一卷

知循州林須撰山在循州境內

鴈山行記一卷

永嘉陳謙撰嘉定己巳遊山直至絕頂得所謂鴈蕩者前人並未之識也然繼其後者亦未有聞焉

廬阜紀遊一卷

開封孫惟信季蕃撰嘗大雪登山至絕頂盡得其景物之詳嘉定初年也惟信能為詩詞善談詭蓋嘗有

官棄去不仕自號花翁遊江湖間人多愛之

何氏山莊次序本末一卷

尚書崇仁何異同叔撰其別墅曰三山小隱三山者
浮石山巖石山玲瓏山其實一山也周回数里叙其
景物次序為此編自號月湖標韻清絕如神仙中人
膺高壽而終其山間今蕪廢矣

湘江論一卷

案文獻通攷作湘江
此本訛作浙今改正

太常博士潘洞撰

海濤志一卷

唐竇叔蒙撰

太虛潮論一卷

永泰縣令錢棲業述末稱天祐六年

海潮圖論一卷

龍圖閣學士燕肅撰進

潮說一卷

知錢塘縣張君房撰凡三篇

西南備邊志十二卷

嘉州進士鄧嘉猷撰紹興末健為有蠻擾邊初莫知其何種族也已而有能別識其為虛恨蠻者時蜀邊久無事既去而朝廷憂之詔諸司經度嘉猷取秦漢以來訖於本朝凡史傳所載蠻事皆著於篇時乾道中也其為志九為圖一

北邊備對六卷

程大昌撰淳熙中進禹貢圖孝廟因以北敵地里為

問對以彼無定居無文史不敢強言紹熙退居追采
自古中華北邊樞紐相關者條列其地而推言之名
曰備對

南北攻守類攷六十三卷

監進奏院趙善譽撰進以三國六朝攻守之變鑒古
事以攷今地每事為之圖

六合掌運圖一卷

不著名氏凡為四十圖首列禹跡次為中興後南北

三境其後則諸邊關阨險要以及北地疆界亦著之
海外使程廣記三卷

南唐如京使章僚撰使高麗所記海道及其國山川
事跡物產甚詳史虛白為作序稱己未十月蓋本朝
開國前一歲也

大唐西域記十二卷

唐三藏法師元奘譯大總持寺僧辯機撰

契丹疆宇圖一卷

不著名氏錄契丹諸夷地及中國所失地

遼四京記一卷


亦無名氏曰東京中京上京燕京

高麗圖經四十卷

奉議郎徐兢明叔撰宣和六年路允迪傳墨卿使高麗兢為之屬歸上此書物圖其形事為之說今所刊不復有圖矣兢鉉之後善篆書亦能畫嘗自題保大騎省世家宣和書學博士又自號自信居士

諸蕃志二卷

福建提舉市舶趙汝适記諸蕃國及物貨所出



直齋書錄解題卷八

欽定四庫全書

史部

直齋書錄解題卷

九至
十一

詳校官侍講學士臣法式善

編修臣程嘉謨覆勘

覆校官庶子臣鄒奕孝

校對官中書臣孫球

謄錄監生臣馮省槐

謄錄舉人臣吳壽朋

欽定四庫全書

直齋書錄解題卷九

宋 陳振孫 撰

儒家類

孔子家語十卷

孔子二十二世孫猛所傳魏散騎常侍王肅為之注肅聞鄭學猛嘗受學於肅肅從猛得此書與肅所論多合從而證之遂行於世云博士安國所得壁中書也亦未必然其間所載多已見左氏傳大戴禮諸書

云肅東海人父朗

曾子二卷

案唐書藝文志及文獻通攷俱作二卷原本作十卷誤今改正

凡十篇具大戴禮後人從其中錄出別行慈谿楊簡

注

晏子春秋十二卷

齊大夫平仲晏嬰撰漢志八篇但曰晏子隋唐七卷

始號晏子春秋今卷數不同未知果本書否

案崇文總目謂

其書已亡世所傳者蓋後人采嬰行事而成故柳宗元謂墨氏之徒有齊人者為之非嬰所自著也

荀子二十卷

楚蘭陵令趙國荀况撰漢志作孫卿子云齊稷下祭酒其曰孫者避宣帝諱也至楊倞始改為荀卿

荀子注二十卷

唐大理評事楊倞注案劉向序校中書三百二十二篇以校除複重二百九十篇定著三十二篇隋志為十二卷至倞始分為二十卷而注釋之淳熙中錢佃耕道用元豐監本參校刊之江西漕司其同異著之

篇末凡二百二十六條視他本最為完善

賈子十一卷

案崇文總目云隋唐志皆九卷新唐書藝文志作十卷此本作十一卷疑誤

漢長沙王太傅洛陽賈誼撰漢志五十八篇今書首載過秦論末為弔湘賦餘皆錄漢書語且略節誼本傳於第十一卷中其非漢書所有者輒淺駁不足觀決非誼本書也

鹽鐵論十卷

漢廬江太守丞汝南桓寬次公撰本始元年召問賢

良文學對願罷鹽鐵榷酤均輸與御史大夫宏羊相
詰難於是止罷榷酤而鹽鐵卒不變故昭紀贊曰議
鹽鐵而罷榷酤也及宣帝時寬推行增廣著數萬言
凡六十篇其末曰雜論班書取以為論贊其言桑大
夫據當世合時變上權利之畧雖非正法鉅儒宿學
不能自解博物通達之士也嗚呼世之小人何嘗無
才以熙寧日錄言之王安石之辯雖曰儒者其實桑
大夫之流也霍光號知時務與民更始而鹽鐵之議

乃俾先朝首事之臣與諸儒議論反覆不厭或是或非一切付之公論而或行或否未嘗容心焉以不學無術之人而暗合乎孟莊子父臣父政之義曾謂元祐諸賢而慮不及此乎

新序十卷

漢護都水使者光祿大夫劉向子政撰舜禹以來迄

于周嘉言善行徃徃在焉其書最為近古

案曾鞏序畧曰向之

序此書於今最為近古雖不能無失然遠至舜禹而次及於周秦以來古人之嘉言善行亦徃徃而有也

此云自舜禹以來
迄於周疑有脫句

說苑二十卷

劉向撰序言臣向所校中書說苑雜事除去與新序
複重者其餘淺薄不中義理別集以為百家後今以
類相從更以造新事凡二十篇七百八十四章號曰
說苑案漢志劉向所序六十七篇謂新序說苑世說
列女傳頌圖也今本南豐曾鞏序言崇文總目存者
五篇從士大夫得十五篇與舊為二十篇未知即當

時篇章否新苑之名亦不同

法言十卷

紫唐書藝文志作六卷

漢黃門郎蜀揚雄子雲撰凡十三篇篇各有序本在卷末如班固叙傳然今本分冠篇首自宋咸始也

法言注十三卷音義一卷

晉尚書郎李軌宏範注此本歷景祐嘉祐治平三降詔更監學館閣兩制校定然後頒行與建寧四注本不同錢佃得舊監本刺之與孟荀文中子為四書

太玄經十卷

揚雄撰五業主事章陵宋衷仲子解詁吳鬱林太守
陸績公紀釋文晉尚書郎范望叔明解贊案漢志揚
雄所叙三十八篇太玄十九本傳三方九州二十七
部八十一家七百二十九贊分為三卷有首衝錯測
攤瑩數文捫圖告十一篇皆以解剝玄體蓋與本經
三卷共為十四今志云十九未詳初宋陸二家各依
舊本解釋范望折中長短或加新意既成此注乃以

玄首一篇加經贊之上玄測一篇附贊之下為九篇
列為四卷首測一序仍載之第一卷之首蓋猶王弼
離合古易之類也卷首有陸績述元一篇

本傳尚有二百四十三表六字

隨齋
批注

說玄一篇

唐宰相河南王涯廣津撰明宗立例操法占法辨首
凡五篇

太玄釋文一卷

相傳自侯芭虞翻宋衷陸績互相增損非後人所作也吳秘嘗作音義豈即此耶

太玄集注六卷

司馬光撰自宋衷而下四家之外有直昭文館宋惟幹注天水尉陳漸演元司封郎吳秘音義通前凡七家集取其說斷以已意

玄解四卷玄歷一卷

右丞襄陵許翰崧老撰所解十一篇通溫公注為十

卷倣韓康伯注繫辭合王弼為全書之例也大抵玄

首如彖贊如爻

案原本脫彖贊如三字今據文獻通攷補入

測如象文如

文言攤瑩捫告如繫辭數如說卦衝如序卦錯如雜卦之類其於易也規規然擬之勤矣太玄歷者亦翰所傳云溫公手錄不著何人作

申鑒五卷

漢黃門侍郎潁川荀悅仲豫撰獻帝頗好文學政在曹氏恭已而已悅志在獻替而謀無所用乃作此書

五篇奏之其曰教化之廢推中人而墮於小人之域
教化之行引中人而納於君子之塗古今名言也

本傳止載政體一篇有曰前鑒既明後復申之故名

隨齋
批注

中論二卷

漢五官將文學北海徐幹偉長撰唐志六卷今本二

十篇有序而無名氏蓋同時人所作

案貞觀政要太宗嘗稱見幹中

論復三年喪篇宋時館閣本已闕又魏志文帝
稱幹著中論二十餘篇則知二十篇非全書也

孔叢子七卷

孔氏子孫雜記其先世系言之書也小爾雅一篇亦出於此中興書目稱漢孔鮒撰一名盤盂案孔光傳夫子八世孫鮒魏相順之子為陳涉博士死陳下則固不得為漢人而其書紀鮒之沒第七卷號連叢子者又記太常臧而下數世迄於延光三年季彥之卒則又安得以為鮒撰案儒林傳所載為博士者又曰孔甲顏注曰將名鮒而字甲也今攷此書稱子魚

名鮒陳人或謂之子鮒或稱孔甲然則顏監未嘗見
此書即藝文志有孔甲盤盂二十六篇本注謂黃帝
史或曰夏帝孔甲似皆非也其書蓋田蚡所學者與
孔鮒初不相涉也中興書目乃曰一名盤盂不知何
據豈以漢志所謂孔甲即陳王博士之孔甲邪

帝範一卷

案舊唐書經籍志作四
卷宋史藝文志作二卷

唐太宗撰凡十二篇以賜高宗

中說十卷

隋河汾王通仲淹撰唐志五卷今本第十卷有文中

子世家房魏論禮樂事書關子明事及王氏家書雜

錄舊傳以此為前後序非也

案晁公武讀書志是書係王通之門人共集其

師之語

中說注十卷

太常丞阮逸天隱撰

中說注十卷

正議大夫淄川龔鼎臣輔之撰自甲至癸為十卷而

所謂前後序者在十卷之外亦頗有所刪取李格非跋云龔自謂明道間得唐本於齊州李冠比阮本改正二百餘處

潛虛一卷

司馬光撰言萬物皆祖於虛玄以準易虛以準玄

潛虛發微論一卷

監察御史張敦實撰凡九篇

周子通書一卷太極圖說一卷

廣東提刑春陵周敦頤茂叔撰

周子通書遺文遺事一卷

侍講朱熹集次刊於南康

帝學八卷

案文獻通攷作十卷

侍講成都范祖禹淳父元祐中編集上自三皇五帝迄於本朝神宗凡聖學事實皆具焉

正蒙書十卷

崇文校書長安張載子厚撰凡十九篇

案晁公武讀書志是書初

無篇次其後門人蘇
昞等區別成十七篇
范育呂大臨蘇昞為前後序皆

其門人也又有待制胡安國所傳編為一卷末有行
狀一卷

經學理窟一卷

張載撰

西銘集解一卷

張載作訂頑砭愚二銘後更曰東西銘其西銘即訂
頑也大抵發明理一分殊之旨有趙師俠者集呂大

臨胡安國張九成朱熹四家之說為一編刺之興化

軍

通書西銘集解三卷

戶部侍郎新昌王夢龍慶翔所集

河南師說十卷

尚書潁川韓元吉无咎以河南雅言伊川雜說及諸

家語錄釐為十卷以尹和靖所編為卷首不若遺書

之詳訂也

山東野錄七卷

殿中丞臨淄賈同公疎撰本名罔真宗御筆改之蓋祥符祀汾陰時所放經明行修進士也

程氏遺書二十五卷附錄一卷外書十三卷

朱熹集錄二程門人李籲端伯而下諸家所聞見問答之語附錄行狀哀詞祭文之屬八篇其年譜朱公所撰述也外書則又二十五篇之所遺者

皇極經世書十二卷

邵雍堯夫撰其學出於李之才挺之才受之穆脩
伯長脩受之种放明逸放受之陳搏蓋數學也曰元
會運世以元經會以運經世自帝堯至於五代天下
離合治亂興廢得失邪正之迹以天時而驗人事以
陰陽剛柔窮聲音律呂以窮萬物之數末二卷論所
以為書之意窮日月星辰飛走動植之數以盡天地
萬物之理述皇王帝霸之事以明大中至正之道書
謂之皇極經世篇謂之觀物凡六十二篇其子伯溫

為之叙系具載先天後天變卦反對諸圖又為易學
辨惑一篇叙傳授本末真偽然世之能明其學者蓋
鮮焉

觀物外篇六卷

康節門人太常寺簿張嵎子望記其言雖十纔一二
而足以發明成書

觀物內篇二卷

康節之子石奉直大夫伯溫撰即經世書之第十一

十二卷也張氏曰先生觀物有內外篇內篇先生所著之書也外篇門人所記先生之言也內篇理深而數略外篇數詳而理顯學先天者當自外篇始先生詩云若無揚子天人學安有莊周內外篇以此知外篇亦先生之文門人蓋編集之耳又曰皇極經世者康節之易先天之嗣也觀物篇立言廣大措意精微如繫辭然稽之以理既無不通參之以數亦無不合案以上三書皆已見易類而解題詳畧互異今並仍之

近思錄十四卷

朱熹呂祖謙取周程之書關於大體而切於日用者
六百十九條取切問近思之義以教後學

元城語錄三卷

右朝散郎維揚馬永卿大年撰永卿初仕亳州永城
主簿從寓公劉安世器之學記其所聞之語

劉先生談錄一卷

知秀州韓瓘德全撰瓘億之曾孫緬之孫官二浙道

睢陽往來必見劉元城記其所談二十一則

道護錄一卷

胡程德輝所錄劉元城語凡十九則以上三書皆刺章貢末又有邵伯溫呂本中所記數事附焉

庭闈彙錄一卷

即楊迴所錄當政和八年其父亡恙時也

龜山別錄二卷

不知何人所錄

龜山語錄五卷

延平陳淵幾叟羅從彥仲素建安胡大原伯逢所錄
楊時中立語及其子迴彙錄共四卷末卷為附錄墓
誌遺事順昌廖德明子晦所集也

尹和靖語錄四卷

馮忠恕祈寬居之呂堅中崇實所錄尹焞彥明語

胡氏傳家錄五卷

曾幾吉父徐時動舜鄰楊訓子中所記胡安國康侯

問答之語及其子寧和仲所錄家庭之訓

無垢語錄十四卷言行編遺文共一卷

張九成子韶之甥子恕所編心傳錄及其門人郎昱所記日新錄近時徐鹿卿德夫教授南安復哀其言行繫以歲月及遺文三十篇附於末

南軒語錄十二卷

蔣邁所記張栻敬夫語

晞顏錄一卷

張栻取經傳中凡言及顏子者錄為一編

晦庵語錄四十六卷

著作佐郎陵陽李道傳貫之裒晦翁門人廖德明子
晦而下三十二家刺之九江

晦庵續錄四十六卷

李太史之弟樞密性傳成之又得黃幹直卿而下四
十一家及前錄所無者併刺之合貫之前錄益見該
備矣

節孝先生語一卷

江端禮季恭所錄山陽徐積仲車語

童蒙訓一卷

中書舍人東萊呂本中居仁撰

師友雜誌一卷雜說一卷

呂本中撰

胡子知言一卷

五峰胡宏仁仲撰文定公安國之季子張南軒從之

遊

忘筌書二卷

浦城潘植子醇撰多言易亦涉異端凡五十一篇此書載鳴道集為九十二篇附見者又十有三而館閣書目又稱七十七篇皆未詳

諸儒鳴道集七十二卷

不知何人所集涑水濂溪明道伊川橫渠元城上蔡無垢以及江民表劉子翬潘子醇凡十一家其去取

不可曉

兼山遺學六卷

河南郭雍錄其父忠孝之遺書前二卷為易著卦次為九圖又次說春秋又次為性說三篇末卷問答雜說忠孝父子世系出處本末詳見易類

玉泉講學一卷

沙隨程迥可久所記喻樗子才語樗本末見語孟類

周簡惠聖傳錄一卷

參政荆溪周葵惇義撰

案周惇義名葵原
本誤作蔡今改正

自堯舜至

孔孟聖傳正統為絕句詩二十章而自著其說自為

一家然無高論

小學書四卷

朱熹所集古聖格言至論以教學者皆成童幼志進

學之序也內篇曰立教明倫敬身稽古外篇曰嘉言

善行

呂氏讀書記七卷

呂祖謙撰乾道癸巳淳熙乙未家居日閱之書隨意
手筆或數字或全篇蓋偶有所感發或以備遺忘者
閻範十卷

呂祖謙撰集經史子傳發明人倫之道見於父子兄
弟之間者為一篇時教授嚴州張南軒守郡實為之
序

少儀外傳二卷

呂祖謙撰雜取經傳嘉言善行切於立身應世者皆

博學切問之事也而大要以謹厚為本

尊孟辨七卷

建安余允文隱之撰以司馬公有疑孟及李邁秦伯
常語鄭厚叔友折衷皆有非孟之言故辨之為五卷
後二卷則王充論衡刺孟及東坡論語說中與孟子
異者亦辨焉

先聖大訓六卷

龍圖閣學士慈溪楊簡敬仲撰

案楊簡官龍圖閣學士此本脫龍圖二字

今補正 取禮記家語左傳國語而下諸書凡稱孔子之

言皆類為此編然聖人之言旨意未易識也喪欲速
貧死欲速朽自門弟子已不能知其有為而言况於
百氏所記其間淺陋依托可勝道哉多聞闕疑庶乎
其弗畔也

已易一卷

楊簡撰

慈湖遺書三卷

楊簡撰前二卷雜說末一卷遺文慈湖之學專主乎
心之精神是謂聖一語其誨人惟欲發明本心而有
所覺然其稱學者之覺亦頗輕於印可蓋其用功偏
於上達受人之欺而不疑竊嘗謂誠明一理焉有誠
而不明者乎當淳熙中象山陸九淵之學盛行於江
西朱侍講不然之朱公於前輩不肯張無垢於同流
不肯陸象山為其本原未純故也象山之後一傳而
慈湖遂如此甚矣道之不明賢知者過之也

明倫集十卷

高安塗近止撰取經傳言行之要以孝為本推而廣之為十篇塗有子登科得初品官致仕

心經法語一卷

參政建安真德秀希元撰集聖賢論心格言

三先生諡議一卷

嘉定中魏了翁華父為潼川憲奏請賜周程謚寶慶守李大謙集而刻之併及諸郡祠堂記文

言子三卷

言偃吳人相傳所居在常熟縣慶元間邑宰孫應時
季和始為立祠求朱晦翁為記近新昌王煥伯晦復
裒論語諸書所載問答為此書邑中至今有言氏亦
買田教養之

道家類

老子道德經二卷

周柱下史李耳伯陽撰昔人言謚曰聃故世稱老聃

然聃之為訓耳漫無輪也似不得為謚

御注老子二卷

徽宗皇帝御製

老子注二卷

魏王弼撰魏晉之世玄學盛行弼之談玄冠於流輩
故其注易亦多玄義晁說之以道曰弼本深於老子
而易則未也其於易多假諸老子之旨而老子無資
於易具有餘不足之迹可見矣世所行老子分道德

經為上下卷此本道德經且無章目當是古本

老子道德論述要二卷

司馬光撰太史公曰老子著書言道德之意後人以
其篇首之文名上篇曰道下篇曰德夫道德連體不
可偏舉合從本名溫公之說如此其不曰經而曰論
亦公新意也

老子新解二卷

蘇轍撰東坡跋曰使戰國有此書則無商鞅韓非使

漢初有此書則孔老為一使晉宋間有此書則佛老
不為二

老子解二卷

葉夢得撰其說曰孔子稱竊比於我老彭孟子闢楊
墨而不及老氏老氏之書孔孟所不廢也所解生之

徒十有三死之徒十有三

案老子解云生之徒十有三死之徒十有三原本作

死之徒有三誤今改正

以為四肢九竅本韓非子解老之說

易老通言十卷

程大昌撰其序言名為訓老而實該六經故曰易老
通言易在而六經皆在矣蓋以易為六經之首也

列子八卷

鄭人列禦寇撰穆公時人

案劉向校定八篇謂列禦寇與鄭繆公同時柳宗元

云鄭繆公在孔子前幾百載禦寇書言鄭殺其相駟子陽則鄭繆公二十四年當魯穆公之十年向蓋因魯穆公而誤為鄭耳

列子注八卷

晉光祿勳張湛處度撰

列子釋文二卷

唐當塗縣丞殷敬順撰

案殷敬順撰列子釋文原本作處順今改正

莊子十卷

蒙漆園吏宋人莊周撰案史記與齊宣梁惠同時則亦當與孟子相先後矣

莊子注十卷

晉太傅主簿河南郭象子元撰案本傳向秀解義未竟而卒頗有別本遷流象竊以為己注乃自注秋水

至樂二篇又易馬蹄一篇其餘點定文句而已其後
秀義別出故今有向郭二莊其義一也然向義今不
傳但時見陸氏釋文

莊子音義三卷

唐陸德明撰即經典釋文二十六至二十八卷

莊子疏三十卷

唐道士西華法師陝郡成元英子實撰元英隱東海
貞觀五年召至京師永徽中流郁州不知坐何事唐

藝文志云

鬻子一卷

鬻熊為周文王師封於楚為始祖漢志云爾書凡二十篇今書十五篇陸佃農師所校

鬻子注一卷

唐鄭縣尉逢行珪撰止十四篇蓋中間以二章合而為一故視陸本又少一篇此書甲乙篇次皆不可曉二本前後亦不同姑兩存之

關尹子九卷

周闕令尹喜蓋與老子同時啟老子著書言道德者
案漢志有關尹子九篇而隋唐及國史志皆不著錄
意其書亡久矣徐藏子禮得之於永嘉孫定首載劉
向校定序篇末有葛洪後序未知孫定從何傳授殆
皆依托也序亦不類向文

亢倉子三卷

案唐書藝文志文
獻通攷俱作二卷

何桀注首篇所載與莊子庚桑楚同亢倉者庚桑聲

之變也其餘篇亦皆依托唐柳子厚辨其非劉向班固所錄是矣今唐志有王士元元倉子二卷注云天寶元年詔號莊子為南華真經列子沖虛文子通元元倉子洞靈真經然元倉子求之不獲襄陽處士王士元謂莊子作庚桑子太史公列子作元倉子其實一也乃取諸子文義類者補其亡然則今之元倉士元為之也宗元唐人豈偶不之知耶

文子十二卷

題默希子注案漢志有文子九篇老子弟子與孔子同時而稱周平王問似依托者也又案史記貨殖傳徐廣注計然范蠡師名鉏裴駰曰計然葵丘濮上人姓辛氏字文子默希子引以為據然自班固時已疑其依托况又未必當時本書乎至以文子為計然之字尤不可攷信柳子厚亦辨其為駁書而亦頗有取焉默希子不著名氏晁公武曰唐徐靈府自號也

鵲冠子三卷

陸佃解案漢志鵩冠子楚人居深山以鵩為冠今書
十九篇韓吏部稱十有六篇故陸謂非其全也韓公
頗道其書至柳柳州則曰盡鄙淺言也好事者偽為
其書反用鵩賦以文飾之其好惡不同如此自今攷
之柳說為長

抱朴子二十卷

晉句漏令丹陽葛洪稚川撰洪所著書內篇言神仙
黃白變化之事外篇駁難通釋此二十卷者內篇也

館閣書目有外篇五十卷

坐忘論一卷

唐逸人河內司馬承禎子微撰言坐忘安心之法凡七條并樞翼一篇以為修道階次其論與釋氏相出

入

天隱子一卷

司馬子微作序言不知其何許人著書八篇修鍊形氣養和心靈長生久視無出此書今觀其言殆與坐

忘論相表裏豈天隱云者托之別號歟

案洪興祖云司馬子微得

天隱子之學未知何據

元真子外篇三卷

唐隱士金華張志和撰唐志元真子十二卷今纔三

卷非全書也既曰外篇則必有內篇矣志和事迹詳

見余所集碑傳

無能子三卷

不著名氏唐志云光啟中隱民間蓋其自序云爾

莊子義十卷

參政清源呂惠卿吉父撰元豐七年先表進內篇其餘蓋續成之

莊子十論一卷

題李士表撰未詳何人

直齋書錄解題卷九